

17 NOV 1996

Mahathir-Timor Timur

PENGANJUR PERSIDANGAN TIMOR TIMUR HANYA MAHU MALUKAN MALAYSIA, KATA PM

KUALA LUMPUR, 17 Nov (Bernama) -- Datuk Seri Dr Mahathir Mohamad berkata hari ini tindakan pihak-pihak tertentu menganjurkan Persidangan Kedua Asia-Pasifik mengenai Timor Timur baru-baru ini hanya bertujuan untuk memalukan Malaysia selain merenggangkan hubungan Kuala Lumpur-Jakarta.

Perdana Menteri berkata tindakan Badan-badan Bukan Kerajaan dalam menganjurkan persidangan itu pada 9 Nov lepas bukanlah untuk membantu masyarakat Timor Timur.

"Apakah mereka yakin dengan mengadakan mesyuarat itu, maka Timor Timur akan bebas?" tanya beliau.

"Tak ada harapan...(mesyuarat itu dianjurkan) semata-mata untuk memalukan kita kerana ini akan memburukkan hubungan Malaysia-Indonesia," kata beliau kepada pemberita sekembalinya dari lawatan 16 hari ke luar negara di Lapangan Terbang Sultan Abdul Aziz Shah, Subang.

Beliau berkata demikian ketika ditanya mengenai pembabitan anggota Pergerakan Pemuda Umno, MCA dan MIC dalam Barisan Bertindak Rakyat Malaysia (MAF) yang mengadakan tunjuk perasaan bagi membantah dan menghalang persidangan itu.

Perdana Menteri berkata tujuan menganjurkan persidangan itu serta menjemput orang asing untuk menyertainya adalah bermotifkan politik.

"Kalau ia (persidangan itu) mungkin berjaya..OK...tetapi ini sengaja diadakan di Malaysia dan jemput orang asing untuk tujuan politik. Ini angan-angan orang sosialis lama," kata beliau.

"Apakah mereka telah mencapai matlamat mereka? Tujuan utama mereka ialah bagaimana hendak memalukan Malaysia," kata beliau.

Ketika ditanya sama ada tindakan MAF itu memalukan negara, Dr Mahathir berkata: "Apa nak malu...tapi mungkin ia (tunjuk perasaan itu) jadi lebih daripada yang dirancang."

Bagaimanapun Dr Mahathir berkata ini bukan bermakna beliau menyokong tindakan MAF itu. -- BERNAMA

ES WAT